



ATASSUT
Postboks 399
3900 Nuuk
+299323366
Fax: +299325840
Atassut@greenet.gl
www.atassut.gl

Nuuk 05. januar 2007

Inatsisartut suleriaasianni § 36, immikkoortoq 2 naapertorlugu matumuuna imaattumik Naalakkersuisunut apeqquteqarpugut:

Apeqqut: Royal Greenland A/S-ip naatsorsuutai kingulliit aallaavigalugit suliffeqarfissuup niuernikkut ineriartortinneqarnissaanut periaatsit pillugit Naalakkersuisut qanoq isummersuuteqarpat aammalu qanoq naatsorsuutigisaqarpat – aammalu suliffeqarfissuup niuernikkut periaaserisassai nunatsinnilu suliassai pillugit suliffeqarfissuup ataatsimeersuarnissaani tullermi siunnerfiusussanik oqariartuuteqassamaarpat?

(ATASSUT-ip Inatsisartuni ilaasortaataitai: Augusta Salling, Ellen Christoffersen, Kristian Jeremiassen, Thomas Kristensen, Godmand Rasmussen)

Tunngavilersuut:

Innersuussutigalugu suliffeqarfissuaq Royal Greenland A/S pillugu apeqquteqaaterput 19. december 2006 Naalakkersuisunut ingerlateqqitarpur kiisalu innersuussutigalugu apeqquteqaatitsinnut Naalakkersuisut akissuteqaataat 04. januar 2007 ullulerneqarsimasoq, erseqqissumik akineqarnissarput naatsorsuutigalugu matumuuna ATASSUT-mit apeqquteqaatitta naalakkersuinermut tunngasortai ingerlateqqippagut.

Royal Greenland A/S-ip naatsorsuutitigut 2005/2006-imi angusai pillugit 11.12.2006-mi ullulerneqartumik tusagassiutitigut nalunaarummi atuarneqarsinnaavoq suliffeqarfissuup kaaviiartitai 768 mio. kr.-inik amerleriarsimasut, tamannalu angusaavoq pitsaasoq. Taamaattorli ilanngullugu oqaatigineqarpoq suliffeqarfissuup akileraarut peernagu sinneqartoorutai 65 mio. kr.-iusimasut siorna 131 mio. kr.-iusimallutik, tassa angusat 81 mio. kr.-inik ajorseriaateqarsimapput.

Ajorseriaat Royal Greenland A/S-imit tunngavilersorneqarpoq ”suliffeqarfissuup raajaleriffiutaasa tunisassiorsinnaassusai aqutsisunit sukumiisumik naleqqussarneqarsimasut”, tamannalu kinguneqarsimasoq Narsami Aasiannilu fabrikinik matusisariaqalernermik, taamatuttaaq suliffeqarfissuup Norgemi raajalerinermik suliani tamaasa annaasaqarluni unitsissimagai. Tunngavilersuummut ilanngullugu oqaatigineqarpoq nunatsinni raajalerinermik suliaqarneq ukiut naatsorsuusiorfiusuni kingullerni suliffeqarfissuarmut 50 mio. kr. sinnerlugit annaasaqarfiusimasoq.

Naak massa ATASSUT-mit paasilluarsinnaagaluarlutigu suliffeqarfissuaq naleqqussartuartariaqartoq, pingaartumik nunanut allanut aalisarnikkut aalisakkerinikkullu unammillikkanut, pingaartumik Canadamut, sanilliulluni naleqqussaasariaqartoq nukittorsartariaqartorlu, taamaattoq nunatsinni suliffissuaqarnerup siunissaa pillugu ATASSUT-mit annertuumik isumaaluppugut, tassami Royal Greenland A/S arlaleriarluni kalerrisaarisarpoq nunatsinni suliffissuarnik ingerlatsineq akisuallaartoq ingerlatsinermullu aningaasartornarpallaarluni.

Taamaammat Royal Greenland A/S-ip naatsorsuutai kingullit aallaavigalugit suliffeqarfissuup niuernikkut ineriartortinneqarnissaanut periaatsit pillugit Naalackersuisut qanoq isummersuuteqarpat aammalu qanoq naatsorsuutigisaqarpat? Aammalu suliffeqarfissuup niuernikkut periaaserisassai nunatsinnilu suliassai pillugit suliffeqarfissuup ataatsimeersuarnissaani tullermi siunnerfiusussanik oqariartuuteqassamaarpat?

Tamatumalu saniatigut makku akineqarnissaat kissaatiginartipparput:

1. Nunatsinni aalisakkanik suliffissuaqarnerup ineriartortinneqarnissaata niuernikkut akilersinnaanginneranik oqariartuuteqartoqartarnera pillugu paasissutissanik itisiliisunik pissarsiniarnissamik Naalackersuisut pilersaaruteqarpat?
2. Naalackersuisut naammaginantumik tunngavissaasinnaasunik ilisimasaqarpat ilumut suliffeqarfissuup nunani allani aalisakkanik suliffissuaqarnera tassatuaasoq suliffeqarfissuup sinneqartooruteqartarneranut aallaaviusoq? Matumani innersuussutigaarput suliffeqarfissuup nunatsinni annasaqartarnerarluni oqariartuuteqartarnera.
3. Royal Greenland A/S-ip tamakkiisumik ilaannakortumilluunniit namminersortunngorsarneqarnissaa pillugu nutaanik alloriartoqarpa?
4. Nunatta nunarsuarmi aalisarnermik, matumani raajarniarnermik, qaleralinniarnermik, saattuarniarnermik allanillu aalisakkanik niueruteqarnermik, aallutaqartut akornanni unammillersinnaassuseqarnera nukitorsarniarlugu Naalackersuisut iliuusissanik pilersaaruteqarpat?

Piaartumik akineqarnissarput naatsorsuutigaarput, akissutillu ukununnga nassiuuneqassasut kissaatigaarput: aus@gh.gl krje@gh.gl thok@gh.gl gora@gh.gl ekri@gh.gl kiisalu landstinget@gh.gl

Qujanaq.